

სრულიად საქართველოს კათოლიკოს-პატრიარქის ქადაგება



ჩვენთან არს ღმერთი

სახელითა მამისათა და ძისათა და წმინდისა სულისათა

წმინდა პავლე მოციქული ბრძანებს: „ურთიერთარს სიმძიმე იტვირთეთ და ესრეთ აღასრულეთ რჯული იგი ქრისტესი“. რას ნიშნავს ეს? ჩვენ უნდა ვიტვირთვით სიმძიმე ჩვენი ახლობლისა თუ უცხო ადამიანისა. ჩვენ უნდა გვახსოვდეს, რომ უფალი ხედავს ყოველ ადამიანს, ხედავს მის გაჭირვებას. ძალიან ხშირი შემთხვევაა, როცა ვერ უძლებს ადამიანი იმ განსაცდელს, რომელიც მოდის მასზე და იგი ჰკარგავს იმედს. სამწუხაროდ, ბევრი ახალგზარდა იკლავს თავს.

იმედი არასდროს არ უნდა დაგკარგოთ. იმედი ეს არის მომავლის იმედი და დიდება უფალს და მადლობა უფალს, რომ ეკლესია გვაძლევს ჩვენ იმედს.

ჩვენ უნდა შევიყვაროთ გაჭირვებული ადამიანი და ყველაფერი გავაკეთოთ იმისათვის, რომ გავუადვილოთ მას ცხოვრება და მივცეთ იმედი.

აი ასეთი იმედის მომცემი საზოგადოება არის ჩვენი მეხანძრეები, რომელნიც დღეს ჩვენთან ერთად წირვას ესწრებოდნენ.

წმინდა სამების საკათედრო ტაძარში იმყოფება საგანგებო სიტუაციების მართვის სამსახურის ხელმძღვანელები და 700-მდე მაშველი-მეხანძრე. საქართველოს ტერიტორიაზე არსებულ 124 სახანძრო-სამაშველო სამსახურს გადაეცემა საჩუქრად მისი უწინდესობისგან ხატები. აქვე გვინდა მოგახსენოთ, რომ საგანგებო სიტუაციების მართვის სამსახურს სრულიად საქართველოს კათოლიკოს-პატრიარქმა 2016 წელს მიანიჭა წმინდა გიორგის ლეგიონის წოდება.

ხშირი შემთხვევაა, როცა მეხანძრეები თვითონ ზიანდებიან, სიცოცხლეს სწირავენ და მე მინდა შევთხოვო უფალს, რომ უფალი დაგეხმაროთ და წმინდა გიორგი იყოს თქვენი მფარველი.

უფალმა ძალი ერსა თვისსა მოსცეს, უფალმან დალოცოს ერი ჩვენი მშვიდობით.

დღეს ვლოცავთ ფურჩხიძეების გვარს. ეხლა მარხვის დღეებია და მარხვის დამთავრების შემდეგ იქნება ახალი კურთხევები.

ფურჩხიძეების გვარი ღმერთმა დალოცოს სახელითა მამისათა და ძისათა და წმინდისა სულისათა.